

四庫全書

集部

欽定四庫全書

集部

草澤狂歌卷二

詳校官庶吉士臣李傅熊

中書臣劉源溥覆勘

覆校官中書臣張虎拜

校對官原任典簿臣郭祚職

謄錄監生臣連彭年

欽定四庫全書

集部六

草澤狂歌

別集類五明

提要

臣等謹案草澤狂歌五卷明王恭撰按恭所作三集鳳臺清嘯已不傳故千頃堂書目有其名而闕其卷數范氏天一閣所藏僅存其白雲樵唱而無此集此集出自秀水汪氏蓋幾佚而僅存也大致與白雲樵唱相近而中

年所作情思較深靜志居詩話嘗摘舉其集中佳句數聯然如渭水寒流秦塞晚灞陵殘雨漢原秋稜櫚葉上驚新雨砧杵聲中憶故園幾處移家驚落葉一年歸夢在孤舟諸句皆詩家常語至雲歸獨樹天邊小雪罷孤峯鳥外青句則小字形容頗拙罷字節次未明又鳥外明河秋一葉天涯涼月夜千峯句尤為疵累夫畫見飛鳥不見明河夜見明河不

見飛鳥上四字自不相貫一葉落而知秋不
係乎明河天河夏月已明不係乎落葉下三
字亦不相屬蓋興之所到偶然拈及不足以
盡其所長讀恭詩者毋執是以刻舟求劍可
矣乾隆四十二年八月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書



提要

欽定四庫全書

草澤狂歌卷一

明 王恭 撰

五言古

方氏日趣軒

端居適清暇愛此林中屋
晚晚田圃間優游會心目
春風始萌達秋草萋已綠
玄蟬號樹枝歲事已聞促
始自感物候終然媚幽獨
物淡境自忘心閒意方足
浮榮豈

不顧安命良無欲緬懷柴桑人臨風佇芳躅

張良進履

羸君震六合侯國日已墮區區相韓心忠憤不得施道
逢龐眉叟感激心內知屈體但長跪忍性能自卑丈夫
有遠畧小節寧顧之慙勤袖簡冊可為王者師終然辟
穀去永與赤松期祇今圮橋道千載令人思

紀夢

假寐登九疑遙遙見湘君文螭與赤豹颯沓何紛紛掩

瑟泣幽怨行招虞帝魂青楓洞庭氣白雨瀟湘昏鑿與
覆華蓋招搖爛垂雲我見未及晚六龍忽飛奔欲陳腹
中事哽咽不得言覺來北窓曙月落啼清猿

逢楚上人

客有紫霞想行尋白雲峯自期名仙會適與高人逢邂逅
展良晤優游企高蹤絲桐屬清響石林聞霜鐘旬時
積陰靄海色浮空濛清旦麗初旭孤帆別匆匆秋山綠
蘿月何日與君同

稽山懷古

遙遙稽山雲淡淡鏡湖水雲水兩無心千秋亦相似憶
昔金門人黃冠此山裏恩榮明但得遂初志蘭亭
何岩堯修竹猶深邃欲識斯人居寂寞山陰是我來弔
遺蹤臨風寫幽意惻愴更何言落日猿聲起

賦得凌霄花寄友人

凌霄產朱夏因依鬱青蒼引蔓絳高樹垂陰近中堂炎
風媚朝景暑雨濕紅芳容華難久恃採折空自傷欲寄

同心者道遠川無梁諒非松柏操佇立徒慨慷

夏日過周六園林因有茶瓜之會

盛夏日方永端居憶登臨同袍四五輩共愛嘉樹林一
徑入幽僻蒼蒼羣木陰脫巾坐石榻拂石絃五琴冷泠
澗泉水婉婉山鳥音葦酒亦易致茶瓜非外尋以茲有
佳趣聊用忘歸心

書雲山小景

岩壑昨夜雨千峯霽朝色白雲何方來相對澹孤寂人

烟帶長林僧宇隣
蛟室落景天際帆
青山鳥邊宅思同
靜者論相期在蘿薜

梅城小景

滄江湛回流荒城
出花嶼海色明遠洲
嵐光過新雨漁家
孤笛秋烟火疎林
暮漠漠天際帆蒼
蒼鳥邊樹若人靜
者流持竿得真趣
取樂非取魚日斜
忘歸去

春夜懷同袍友

春夜不能寐
起坐彈吾琴
泠泠七絃上
感激懷知音
微

雨半簾靜孤燈千里心故人不可見况此別來深幽期
詎可即夢裏能相尋

送人中秋闌歸莆中

治世竟先達英材惟陸機秋闌况得意復憶家林歸落
日江上別涼風吹客衣壺山鬱葱情莆水清漣漪為言
到家日未幾登王畿無令得桂手虛負看花時談笑青
雲上誰念山中期

樵父詞

生不適州縣采薪南山岑窮年事登陟辛苦力不任濯
足清澗水息肩垂蘿陰落日晚獨還微風動謳吟唯應
鹿門隱可以諧我心

秋夜宿石門洞

勝寄越籌嶺霽心投翠微陰林見法侶盡夕留松扉石
門發天聲海月澄秋衣風泉有餘響倏爾清塵機願言
托香界信宿以忘歸

新秋有懷

梧桐覆金井鏡水澄秋碧商飈忽來過一葉涼蕭索落
葉尚號蟬芳山復鳴鴟夕露生我衣天河夜深白惆悵
思遠人滄洲坐來隔

與同志泛舟得練字

日夕山水佳揚舲劇歡燕雲光落妓釵露氣侵紈扇遂
結鮫人居仍窮水晶殿微月天際來澄波靜如練

古鏡

妾有蟠龍鏡秦王在時見繡澁隱菱花蒼蒼蝕蟲篆浮

雲薄太清孤月沈秋練從此知妾心何由見君面

蘭畹

蘭生被九畹歲蕤凌衆芳風泛紫英秀露滋雲葉涼
戢之以為佩何必珩與璜常恐雪霰集將隨蕭艾荒
相思在元澧日夕空徬徨

書靈山法堂

香臺隱鷲峯鐘聲雲蘿深半壁見燈影虛空聞梵音
忍草被幽石靈花曜陽林唯應虎溪水可以清塵心

題東華觀壁

林館隱空青鳥外
三花夕藥草半庭
閑烟蘿數峯碧陰
林絕行蹤曠古多
靈跡獨鶴天際還
寒流月中白偶與
仙人期塵心坐來息

越城聞笛

朝登清冷臺夜宿無諸郭
羌笛何處來梅花夢中落
悲涼關月寒淒斷秋山薄
不是別離人聞爾亦蕭索

南山塔晚眺

金定四庫全書
卷一
層標際飛翠落日懸孤嶂霜降羣山殘天秋百泉響夕
鳥澄遠心歸雲發遐想願言謝塵埃復此丘中賞

言懷

拂鬱坐空宇蕭索鴻雁鳴涼霜襲飛幔北斗當前楹撫
劍中夜起空歌感平生聊持一樽酒獨酌懷吾貞古來
曠達者豈願身後名原陵久已沒此懷為誰傾

山齋遣懷

雨後山意閑孤吟葛衣薄淑風散松香幽景變林壑飛

雲淡而歸宿鳥欣有托誰歟大夢間擾擾獨先覺仲尼
羈旅人伯陽遜西漠大聖古且然吾氓任蕭索黃金爾
何為適此悔吝作服食不願餘晨炊飽藜藿

水墨山水

楓林翠微裏暝色川已澄巖芳晴冒雪澗綠淺流水仙
賞澹舟處猿聲青葛藤永懷不可即雲月下清冷

秋谷飛雲圖

仙賞夙所慕幽期行獨尋清耀在中鳥微聞丘中琴流

金屋日人
卷一
水澹孤興歸雲閑遠心從茲謝朝市永極烟蘿深

贈何秀才

東海有佳士被服美且都厲節抗時貴法言驚世儒淵
玄五經古纚纚若貫珠管葛為之攝儀秦為之愚黃金
作高臺可置七尺軀惜哉時不遇落拓如凡夫

其二

涼飈革炎熾孤雲薄層陰油然起膚寸倏爾為甘霖志
士蘊經濟優游樂山林時來適所遇泛若雲無心斯情

永在春此道將誰任世復賤荆璞人猶貴黃金黔婁固
窮者千載無知音

輓晉安何文學被役卒遼東

故鄉寧不死嗟爾沒邊州野水遼天遠寒山海樹秋芳
城書店悄殘日總帷幽惆悵吞聲別誰堪久淚流

哭亡友陳一

訃聞君欲死驚定淚沾衣梁獄書徒上秦臺鏡亦非恨
深淮草綠魂遠越山微從此無期會閑宵夢爾歸

草澤狂歌卷一

欽定四庫全書

草澤狂歌卷二

明 王恭 撰

七言歌行

汲井嘆

輓轡懸青絲芙蓉覆金井
比君不照心似妾可憐影
銅壺墮水風捲花爲君中路
改榮華人生百年有知己
暫時榮落何須嗟

題琴合故衣卷

嶧陽古桐瓊樹枝
吳絲作絃雲錦衣
黃家舊物紫陽篆
彪炳文章光陸離
亂離何事翻相失
龍池鳳沼無春色
淪落天涯幾百秋
豈意人間今復得
琴囊雖好人更清
相逢脫贈應有情
君看昔日延陵對
好是悠悠身後名

漫歌行

君不聞豐山鐘古銅
裂缺追蠹蟲
霜華滿天激清響
夜夜龍鳴西頂中
君不見豐城匣中三尺水
凜凜神光射

眸子蜿蜒已沒秋海空落落寒星氣猶紫烈士英靈亦
如此黃金散盡遊下邳四海蕭條人竟欺男兒豈負報
國憤此心感激誰能知悲歌擊筑來燕市易水秦原幾
千里鼓刀屠肆心可憑慷慨夷門為誰死青袍買酒上
林春衣上徒香京洛塵五侯賓從少知己羽林年少輕
才人山中布衣取卿相太后穰侯不相讓入門長揖隆
準公致身歛在青雲上狐裘柘弓那可期長楸走馬行
射麋何須白髮魯中叟轉數黃鬚塞上兒以茲却羨歸

來好驅車便發青門道青門柳枝三月春飛絮愁人不
肯掃石門山水青如苔與君閑來日幾回寧無祿米二
千石莫棄黃罏三百盃

鷓鴣啼懷林十二謫後

鷓鴣啼聲鉤輶空林積雨寒蕭索黃茅嶺上幾人行綠
樹村南萬花落鷓鴣啼聲格磔誰使霸陵遊翻成夜郎
別惆悵偏傷行路心苦道行人行不得昨憶王門聞曙
鷄今朝愁聽鷓鴣啼驛樓宮樹曾不悟旅舍郵亭應始

知鷓鴣啼草淒淒長淮路去弗迷

龍門行留別陳大因悼楊關西

楓林野水龍門道海嶼青冥秋浩浩沙頭昏曉落寒潮
渡口寒暄自芳草芳草萋萋春復秋來往行人應白頭
十年不醉龍門夜此復經過愁更愁綠江沈沈泛輕舸
旅舍蕭條獨行坐秋風颯颯吹雁來山葉飄飄向人墮
元龍高樓誰復過子雲舊宅今如何年芳寂寞山花笑
往事淒涼野鳥歌此去傷心不能已嘆息人間祇如此

詞賦空留千萬言，世人見如一盃水。
淪落天涯一遇君，龍門之下又離羣。
那知別後芳山裏，叫月清猿誰忍聞。

霜天曉角

女垣啼鳥，天已霜。玉龍一聲愁斷腸。
商聲淒淒，羽聲切切，畸士孤臣，皆惋傷。
玉門斤埃連沙漠，置酒軍中，少歡樂。
鐵面將軍，慘不驕，碧眼羌兒，淚先落。
洛水蕭條，渭水頭隨風，悲壯五陵秋。
可憐金粟，驪山下，誰識千秋萬古愁。
自從棄置江淮久，幾處聞之應。
白首瞑色，摧殘隴上春。

風光不度邊城柳，今宵縱酒歌別離。
雪花著人寒不知，麗譙別後聞吹角。
與君同此長相思。

經甘蔗州贈朱山人

北風吹長林，林下白日曉。
黃茅獠洞少人行，萬磧千峯絕。
飛鳥臘盡山中霜，正繁長裾短策扣君門。
棕櫚巷裏人烟僻，蔗葉籬中鷄犬喧。
君家結構連雲起，樓上青山下溪水。
溪水東流竟不回，野花林路長蒼苔。
澗中落落青石小，谷口矐矐錦樹迴。
知君久負青囊秘，前代曾楊

共流輩山北山南得墓多
白壁黃金買無地中屢長留
懶出山姓名那得滿人間
灤河易水不堪聽鍾阜龍盤
猶可觀

羽林少年行

羽林少年任俠子
自矜生小豪門裏
傾財破產不顧貧
剖肝隲膽向知己
壚頭少婦邯鄲姬
燕歌一曲舞羅衣
飛觴勸盡蒲萄綠
揮鞭擊碎珊瑚枝
黃雲避迹烟塵暮
轉戰千場身不顧
性命由來一羽輕
得功讓與將軍去

歸來下馬洛陽城洛陽年少爭逢迎連營部落避旌節
大府官僚如弟兄一朝流落英雄盡獨立春風吹鬢影
長歌一劍江上行更問平原家遠近

冶城遇集呈陳紳進士因觀故人陳則誠博士

書至

冠蓋相懽冶城下王壺青系酒如瀉君是南宮第一流
予乃夷門最卑者別來看君毛骨奇美髯大額仍赤眉
丈夫意氣有如此男兒性命那可知結交况復同鄉里

年少唯君最知己相看不忍問同袍十人幾箇黃泉裏
生別故園長苦辛又愁親老更家貧三年古戍鄉心遠
四壁秋風山鬼隣桐邊校文近有書書中還道意何如
乃知別後相思苦未必青雲交態踈

西林野老

西林野老頭皓白飲淚燈前對孤客昔年曾過君家門
君時有子仍有孫奔走星纏不停轂昔嘆人生如轉燭
掌中已失月明珠目下誰憐汗血駒少年風光那可想

西麓田疇日應往荒園種豆苗不生白首驅牛犁不行
日暮涼霜拂高樹桂花門前隳如雨世事悠悠莫怨嗟
得錢還醉黃翁家

閨中曲

妾家官道廣陵堤甲第朱門隨柳低豈期夫壻重游俠
走馬探丸仍鬪鷄朝歡田實青油幙暮醉金張白接羅
去年驅車洛陽北今年結客太行西不逢何處寄西雁
空數行人歸馬蹄簾前春色寒淒淒鉤輶飛鳥妾亦啼

機中雲錦看成淚，門外飛花踏作泥。
愁時把鏡空自悲，消減容華誰得知。
東隣少年不相別，嫁來原自娼家兒。

醉歌謠

君不見貧士裁衣白苧鮮，暫著翻成惜於錦。
相逢正乏杖頭錢，脫買黃壚對君飲。
胡椒千斛金百斤，誰能長醉甕頭春。
但看越人城南松柏裏，古墳蕪沒今墳新。

送人復雷陽軍

十月河水寒，北風柳條折。
行人懷往事，恨恨不能別。
男

兒慷慨重橫行魚腸二尺角弓鳴時來看子請纓去王
門何處烟塵生

贈桃源陳處士

逢君滄海心脫畧當世事疎散義熙人風流建安氣丈
章只掉三寸舌如瓶注水爭淋漓先秦遺收汲冢祕五
經發難無留疑桃源瀟灑衡門裏悠悠逸興東流水布
襪青鞋白苧衣角巾野服烏皮几去年著書梅隴山今
年濯足苔溪灣身隨幽鳥栖復遠心與孤雲閑復閑有

時山水窮登眺綠蘿嫋嫋聞猿嘯林霜澗雨不逢人手
掇松枝向誰笑有時中酒高窓眠飄蕭素髮臨風前胸
中况是丘壑美身外能無纓冕牽君不見終南青青幾
芳草行人只道長安道昨日青雲相識多五陵衣馬今
如何

織苧篇

鳴機聲裏花如霰白日簾前那忍見嬌容無力十指纖
幾日繞成一匹練年年輸稅入官家姑老兒雛空嘆嗟

夫婿官遊行不歸妾身長著嫁時衣

寄宿田家

日暮寄宿在田家谷口南風生棗花田夫歸來繫牛牯
向前問客何鄉土厨頭喚婦具黃梁樹裏攜瓶沽酒漿
木綿作衾溪石枕青竹為燈照吟影田夫更語妻勿嗔
客子不是尋常人

歌行重別海上陳文學

去年別君歸秋風吹人黃葉飛今年與君別柳條拖地

花如雪人生會合能幾時問君結交何太遲得錢相逢
且沽酒擊劔何思悲路岐白雲海上連天闊湖山微茫
青一髮別思空隨海上波歸心已絆雲邊月君莫愛長
安道上金明枝密葉青青霜後移南山桂樹無凋期

歌行贈李隱逸兼張林二學士

客行清溪上愛此溪中水時有溪上人心期亦如此溪
水東流清復深扁舟幾宿到雲林垂蘿飛鳥引行步野
鳥閑雲知我心君家住處如盤谷四面青山霽人目五

月簾櫺鳥外聞
千年松桂霜中綠
溪南溪北幾人家
種田收豕仍桑麻
蓬萊仙洞只藥草
武陵流水空桃花
曲堂置酒留清曙
落雪飛花滿行路
黃石山中辟穀時
呼猿洞裏看梅處
日暮寒風吹轉蓬
暫時相見未從容
待予謝却龍池客
他日來從兔苑農

梅花引為林逸人賦

北風吹霜百草折
官舍人家梅盡發
橫枝放暖天為香
亂蕊凝寒雪逾潔
今古何人解愛梅
繁花空自雪中開

愁雲夜掩凌風觀蔓草秋生却月臺風流獨數巢居閣
門閉孤山老雙鶴不轉胡姬笛裏生寧隨漢女宮中落
君向林間住日長相逢花底未渠央最宜明月照行旆
不憤飛花落酒觴酒邊花下堪留客回首東風拂行跡
明月扁舟歸去來故園亦有凌霜栢

海上贈別駕馬英

杜陵才人新豐客劍佩相逢舊鄉國縱酒狂歌梧桐秋
遠遊夢著邯鄲陌黃金高臺無復過青雲夫路古來多

諸侯貴門君不到五陵豪氣今如何只今家貧誰比數
黃葉秋風滿窓戶半室閑樓嶺上雲一瓢獨飲山中樹
薄俗紛紛那可言暫時貧賤不須論君看舊日揚雄宅
寂寞蒼苔空閉門

酬關西故人

故人跡疎情尚爾新人面好心猶異當時唯恐結交稀
零落相知竟誰是昨日方開北海樽今朝又署翟公門
世情反覆徒為爾人生貴賤那可論自從落拓風塵久

歲月蹉跎世看醜
羨君閉門但讀書
知君得錢即沽酒
我亦辭君向白雲
山中猿鶴可為羣
秋來偏是凌霜栢
五粒松脂堪寄君

荅林逸人兼柬劉大因憶滄洲野堂叟

小來攀俠遊
脫身過伊闕
白馬行看戚
里花錦袍
醉舞娼樓月
娼樓酒慢官
道春孟嘗
平原能愛賓
報仇雪耻
感恩遇瀝
膽隳肝寧
顧身以茲
意氣紅塵
裏悠悠歲
月東流水
交態空輸
杜宛兒
致身不及
南隣子
常何新豐

識馬周蔡澤秦川尋應侯西京誰復念王粲間關雨雪
來依劉劉君世胄前司馬德業龍陽復瀟洒弱冠追隨
今白頭流落看同最親者邇來江漢與君逢章甫衣裳
多雅容看君自是龍池客斂跡寧甘兔苑農同心且道
相逢晚薄俗紛紛夢猶懶囊中久閉龍唇琴世上終希
廣陵散大堤沙水白粼粼爲子歸訪滄洲人

江國晚秋

澤國秋氣深微霜葛衣薄斜日川上寒孤峯鏡中落渺

渺粵人烟依依海山郭
隣笛聲已淒遙
砧晚猶作滄波
苦竹斷猿哀蔓草黃
花與嘯臺前代風流亦如此如何
不飲杜陵盃

鷄公壟

荒崗古墓鷄壟邊
蔓草離離生野烟
狐狸養子隱荆棘
烏鳶作巢銜紙錢
石麟埋沈土花濕
雕磚剝落樵人拾
天陰燹火暗復明月下
精靈語還泣此墳未必無子孫
夙昔傳聞皆宦門
浮榮一去不復盛
空餘古木啼清猿

誰家新塚高數尺又買西家墳頭石憶過秦中北邙路
喪車鱗鱗塚無數黃金買山葬死灰昨日官軍斫墳樹
崩塋斷壙碎苔痕髑髏無聲眠草根生前意氣動山岳
身後淒涼邈九原君不見羊公峴首石已刻季子延陵
碑尚存錦袍醉倒長安市誰招落石江心魂豈知百年
後身世兩俱沒貴賤終同草上塵昇沈且進盃中物笑
矣乎悲矣乎眼中之人今有無

醉歌行留別張潛

中夜飲朱顏醜鬱金美酒金叵羅揚眉吐氣為君醉相逢不飲當奈何思君隔長河會少離別多劇歡繼銀燭婉孌出青娥江謳越吹空浩蕩郢中白雪揚清歌春風無情吹桃李昨日花開今結子貴賤悠悠何足論古來萬事東流水卬山之墳半無主馬鬣蓬科動離黍銅雀歌鐘散晚烟茂林松柏凋寒雨酒闌莫唱丁都護空使哀情慨今古青鏡頻看髮漸稀黃金一去交難固少年心事誰共知結交誤結輕薄兒一朝貧賤忍相棄豈惜

浮沈應有時樓頭楊柳垂青絲樓上與君傷別離傷別
離長相思水流花謝兩相失雨散星離從此時明朝更
越千萬山再歌一曲行路難行路難摧心肝

放歌行酬林逸人良箴

拂鬱促刺三十秋過眼光陰如水流黃金白壁果何物
世人見我如雲浮寒衣太行屹嶢絕瞿塘逆水無行舟
君山洞庭濯雙足石鏡香爐時一遊蒼梧隔雲叫虞舜
湘靈無聲風雨愁遙望金陵道葱葱鬱佳氣錦袍白馬

競時來翠華閣道連天起又向秦中登太華黃河一髮
天邊瀉三峯連綿不可攀中有長生解飛者結交廣成
子招邀洪崖翁口含明月駐精魄身騎白鹿回飈風笑
誇蓬萊指絕頂更歷元始窺鴻濛羽人如雲集星宮三
十六帝俱雍容帝前玉狗聲啗啗帝旁侍女宮衣紅小
臣手擎綠字封拜詔元父隳丹衷願為下土招揚雄揚
雄才大人稀識窮蒼蒼苔少行迹車馳馬走長安城揚
雄與人無世情明當攜手天門歸青霓為裳紫霞衣朝

飲天池暮沉瀝下視九土如塵微

洗馬潭

苔髮毳毳古潭淨齋淪積水流如鏡昔人牧馬今不還
蔓草繁花自相映憶昔前朝全盛時驛驢叱撥人爭騎
風流一去夢相似陳迹空爲人所疑牧叟耕童閑來集
對此誰能感疇昔磯下從教鹿飲潭沙邊不管牛行迹
昨夜風雷繞太清青山彷彿聞龍鳴此中何代無英者
會見承平人洗馬

送人至溫陵

江城五月南風作，榕葉初涼棗花落。官爐酒貴人不賒，
客路無錢少歡樂。憐君個儻能遠遊，粵王潭頭繫小舟。
經過不待平原席，菱落寧悲季子裘。自言家住桐陰下，
雲榭臺中日瀟洒。紫英花開香滿衣，檳榔葉大寧論價。
三十年來何愴哉，淒涼人物與蒼苔。明珠象齒不復惜，
海客番船何處回。別來鄉縣還幾旬，况得延陵為主人。
論文自是少知己，薄俗誰能無棄貧。嗟予飄轉紅塵裏，

千載春衣厭泥滓醉後狂歌空有神交態看同一盃水
送君遠遊歸故園我亦還山依鹿門相思平遠臺頭月
忍聽清原洞口猿

出門行留別城中友

出門將行復少住牽車卷策誰家去五侯池館少逢迎
行人不過新豐樹長安西上行路難壚頭酒貴金買官
漢庭諸君忌年少長沙遠謫何時還梁園賓客今何在
梁園種木聞已大梁園歌舞已浮雲空使行人想風采

金定四庫全書
卷二
此意臨歧難重陳相看孟酒淚沾巾紫菱葉大荔枝熟
莫愛風光忘却人

觀滄洲二藁有作

古人名詩凡幾家陰何徐庾皆清發遂使少陵謫仙輩
深得黃初建安骨爾來作者雖能鳴此翁吐詞多正聲
百年英氣結詞賦每日揮洒娛心情鏡湖流水澄孤月
太華蓮峯積飛雪千載黃鍾繡作花三嘆朱絃響陳越
滄洲二卷俱可人首首看來如有神始知先輩老風格

不逐餘子徒清新角中野杖閑瀟洒綠水清池思堪寫
願得明時入帝京闕宮清廟歌承平

題建安朱氏杏林雲隱圖

君不見廬山岑董仙在時花滿林身騎白鹿忽飛去江
海寥寥千古心君今種杏知何所解向青山作茅苧雲
中澆酒祀岐黃林下還丹結龍虎羨君有道不羞貧賣
藥無錢常與人抱琴出谷迷行屐散帙臨流醉角巾武
陽山水多奇處金鰲蒼蒼但烟樹鷄犬長鳴石上苔漁

樵未識松邊路自是先賢
六代孫布衣不到五侯門
相逢又欲還山去他日思君愁斷猿

酬陳大見寄

北風海上來落日草根白
長嘯登高丘遠望無諸國
劔水東流霸氣寒臺江千樹葉聲乾
英雄去後遺弓劔蔓草芳陵那忍看
我家正在平臺北十載迷蒐歸不得
幾度逢人問故林碧池細柳今蕭索
少年任俠無所憂奮身欲向銅龍樓
長安春物忽相棄終南灞水空悠悠青

雲迢遞誰將引况乃摧殘更多病綠髮從教變雪霜丹
心未必隨灰燼陳君個儻無世情讀書千卷尚逃名一
門兄弟俱才俊百歲嚴君更老成感君意氣空流俗貧
賤相看情轉熟客舍迎霜已贈衣山儲累月常分粟風
雨淒淒四月天孤村芳館度流年未投定遠傭書筆羞
逐君平賣卜錢

答馬造士鐸

請君膝上弦泠泠拂商羽古調淒涼那可聞世情反覆

寧堪數擊劔狂歌浪自驚平生肝膽向誰傾梁王宮闕
隨草蔓綠池堊樹空蟬鳴五陵豪貴能相棄知己悠悠
竟誰是客舍鄉書醉懶題蒼苔落葉門還閉以茲感激
無所求閒卧茅齋四壁秋西風笛裏山陽淚半夜燈前
季子裘愛君長才世希有鄉縣黌宮坐未久踏槐折桂
應早期白日青雲兩無負雁峯積翠高連延喬木蒼蒼
幾百年君家正在雁峯下此樹正對湖山前知君愛客
情偏重春酒槽頭百餘甕積雨閒宵醉共眠空林達曙

驚殘夢夢時曾向故園歸
歸見鄉隣故舊稀
傷心一二同袍友
問我飄零只布衣
貧居斂跡甘自守
豈料天涯與君厚
幾日相思不見君
令人獨坐空搔首

奉寄鄭浮丘先輩兼簡龍門漫士

陰寒變微暄
澤國東風後
嚶嚶黃鳥語
裊裊青絲柳
滄洲二月花
正開滄洲堂
上置酒盃
登堂忽見浮丘面
借門行人何處來
去年走馬朝京闕
鵬月都門正飛雪
客舍偏驚白下春
歸心不醉秦淮月
聞君昔時能遠遊
飄

如黃鵠橫九州掉頭不肯縛塵綬長嘯曾乘踏海舟風
流況是才名久健筆雄詞世希有生事何須負郭田丈
章只在令人口擊筑邀歡喜盍簪青山落日孤猿吟三
更酒醒人散後惟見月白平湖深此時與君情轉熟客
裏相看不能別問我摧殘向幾秋離心未忍從頭說相
隨相送雁峯頭雲散青天碧海流送君別來未幾日落
花春暮令人愁人生萬事傷懷抱那似淒涼不堪道舊
友凋零半九泉故園索寞空秋草龍門高士更清真傾

蓋由來不棄貧看君共是青雲客應念悠悠失路人

明老賦萬石崗

蒼山西來爭駿奔衆峯獨有籌山尊連崗陂陁走闕陸

參錯萬山如雲屯我疑秦人鞭石走平與人家作原阜

又疑仙子遣羊羣有形猛若猛獸蹲乃知元氣自凝結

異狀竒姿寒突兀

闕

不物白雲根曉霧長迷玄豹穴

曾聞山下有高墳彭城餘慶多子孫聲名能與崇崗並

他日當為萬石君

樂府奉寄陳九梅江先輩

古鏡蟠龍野苔色赭顏欲改青鬚白三尺魚腸燭下看
玉壺擊碎心未寒悠悠漳水輪臺樹信陵平原渺何處
騎射紛紛杜宛兒驕嘶紫燕躍青驪銅駝陌上香風煖
田實門前客應滿白頭執戟不遷官盡日草玄門自閑
雪風蕭蕭面如割史雲桁上無全褐君不見羊腸九折
坂又不見瞿塘灩澦湍萬古千秋行路難

歌行贈別友

湖中雪晴水始波湖上數峯閑綠蘿綠蘿飛烟數千丈
夜夜惟聞猿鳥多君家宛在青松際瀟灑山中無不至
風流誰識漢王孫文采猶存建安氣五侯門外賓如雲
羨君不過五侯門閑中慣識麋鹿性夢裏長親鷗鳥羣
閉門讀書寧自守未肯低頭縛塵綬應懷白壁重連城
要取黃金大如斗文章於我亦何有跣足夷猶萬夫後
飄流江海兩鬢蓬落拓風塵一盃酒別君此去春風回
天涯碧草令人哀乃知萬事徒為爾獨愛孤雲歸去來

秋胡妻

妾家近叢臺生小邯鄲裏結髮事良人行當念終始自
從十五到君前容華初未得君憐春風秋月長羞見况
復行人去日邊昨憶送君往陳汝直謂君情暗相許何
事青雲得路時相逢却問桑間女君思妾貌棄黃金河
水東流知妾心寧將一死謝君去千古特爲節婦箴

齋居喜故人陳希召見過仍贈別云

積雨卷幽幔閉門閑苔色病起離心正鬱陶出門喜見

同袍客行客遙從海上來春風兩袖無塵埃乍開深竹
沿花逕更掃閑雲坐石苔悠悠烟水芳村下也似蕭條
孟諸野幾度空吟碧海秋一壺具醉西齋夜憐君幽隱
在瀛洲海嶼壺山愜勝遊籬下長栽陶令菊興來復上
謝公樓仙人峯上近何如此去逢人好寄書莫將夢入
青雲者忘却秋風揚子居

行路難

飲君玉壺酒聽我擊劍歌孝王賓客久寂寞梁園修竹

今如何五陵年少無知己膠漆陳雷更誰是昨日青雲
四五人棄我悠悠一盃水錦袍白馬何匆匆當街上馬
坐春風並轡朝回雙闕下看花醉倒五陵東他人逐勢
爭先後佇立道傍齊拜手君不見蘇秦未遇韓信貧流
落江湖聊寄身一朝恩寵賜顏色豈得長為飄泊人

江上吟

閑雲悠悠水浩浩二月江頭看花早畫楫蘭舟去復留
玉甕銀瓶奈傾倒興來攜妓入中流急管青絲問楚謳

青青菱荇浮翠澈兩兩鴛鴦貼遠洲百年世事東流水
何似傾金長買醉梁苑歌鐘盡杳茫茂陵松柏空憔悴
酒酣山水忽忘形何必滄浪歌獨醒更吹橫笛望空闊
江楓寂歷江山青茫茫仙島無行路清水黃塵不知處
欲向丹丘訪羽人身騎白鶴高飛去

送畫史林虛白歸嶼南

佳君本是林泉客花嶼閑居樂虛白幾年畫裏識君心
此日尊前見顏色興來為寫輞川圖烟光潭影相糝糊

不羨南宮稱小米更從物外驚方壺看君精藝有如此
何乃鬱鬱栖窮途悠悠世事東流水欲向何門曳珠履
梁苑歌鐘久不聞信陵賓客徒為爾白雲望望頻回首
說道家林別來久斗酒臨歧且盡歡殷勤更問重來不

聞友人尉吳門

泮林才子閩州彥抱得麟經過淮甸自從典教入王門
幾度春風候玉輦今年作縣下吳門吳門烟月倍離魂
豈知梅福為仙尉莫學陶潛縱酒樽吳門憶昔扁舟度

正是故人任官處丹楓江上碧天秋疎鐘聲外寒山暮
嗟予浪跡西復東年年道上隨飛蓬獻賦無因謁明主
彈冠自笑空龍鍾長洲苑外多佳致山水閑時日應至
宦遊莫比在長沙聖主恩深漢文帝

夢游天台

東海窺蓬萊弱水浩蕩隱映金銀臺青山瞰吳越烟霞
明滅縹渺連天台天台岩堯一萬八千丈盪摩日月青
雲上西傾泰華出蛾眉東拔嵩丘振雁蕩我昔傳聞心

亦驚一夜飛夢遊赤城赤城孤月照我影送我迢迢度
華頂華頂連天高百越憑虛空兮見溟渤雲溟濛兮山
欲雨波洶湧兮石飛雪深林層崖陰晦忽熊咆龍吟悲
風發仙人其來兮紛紛揭華蓋兮爛垂雲綽約兮金母
杳靄兮元君秘玄章兮綠字揮寶劍兮星文命廣成洗
髓洪崖濯髮五粒松花飽予肌骨忽抱雲璈飛上天俄
然一笑三千年又作石橋別遥遥見金仙龍象何蹴踏
天花雨翩翩遺予舍利子鏗然金石堅逍遙上兜率列

坐談空禪須臾驚覺心亦碎
祇疑枕席烟霞裏四壁蟲
聲夜正分一簾月色寒如水
天明走馬入紅塵忘却仙
遊夢時事

題嶼南林遵性所贈墨竹

憶昨南遊花嶼頭問畊堂上幾
日留江雲渭樹無期別
雨散星離空復愁渭川逸節何
瀟洒多公遠寄山中者
籥法偏凌與可前風流不在吳
興下秋風野館閑蕭蕭
何以報之雙瓊瑤青山向夕捲
幽幔明月入戶窺參寥

知君本是金門客，何乃栖遲在泉石。見畫令人重憶君，
秋風黃葉又紛紛。

送僧歸日本

法師東南秀，成行獨清苦。一錫行挑貝，葉書孤帆笑。別
扶桑樹茫茫，海水無行路。水月澄澄印禪悟，經梵朝殘
五老雲鉢盂。夜洗三山雨，隨緣忽復東。歸去萬里鯨波
一盃渡，夜半龍吟丈室雲。天邊鳥沒千峯曙，塵緣未斷
那可攀。別後知師向何處。

山中喜故人綉衣使者見過

谷口夜來雨閉門，碧苔深單居絕儔。
侶鬱鬱愁我心臺，中故人舊相得別來。
不道青雲隔驄毛駿馬綉衣裳，飄飄來問山中客。
山中野人獨布衣，十年分與故人稀。薜蘿深處開花徑，猿鳥聲中候竹扉。
西遊不問行來久，且喜林間一攜手。幾度空看海上雲，相逢好醉盃中酒。
酒酣擊劒歌未終，樽前別思又匆匆。羨君大隱金門裏，嗟予還卧青山中。
山中寥寥日將夕，芳草萋萋謾相憶。滿

地殘花送馬蹄天涯目斷愁難極

聞笛歌送人之塞上

橫笛對離亭扁舟越江口月下何人最斷腸天涯怨別
吹楊柳楊柳繁音愁復愁梧桐蕭瑟江楓秋長林半夜
葉皆脫積水三江雲不流長夜漫漫聽未了變羽回宮
猶嫋嫋越海天邊鳥不飛閩關月暗猿聲小須臾一曲
更淒清零落梅花滿楚城楚城迢迢接沙磧邊客聞之
淚俱滴黃埃積雪暗長關絕域窮荒草根白此夜愁心

獨對君明朝
悵別又離羣
單于城上吹羌管
知爾相思
不忍聞

箏人勸酒

新豐美人青樓姬
絳裙玉腕嬌
雙眉暫歇秦箏
勸郎酒
西涼蒲萄金屈卮
郎君但飲休
辭醉百年悠悠
醉中是
神血朝凝不復知
日暮青山北邙裏
迴身更整十三絃
金雁離離繞鈿蟬
十二闌干月將墜
錦筵紅燭浮青烟
人生歡樂那能久
豈悟星纏倏忽走
妾顏未改君少年

日日樽前勸君酒

書雲山小景

山蟬聯兮青青水潺湲兮浩浩樹叢叢兮遠人烟雲漫
漫兮飛鳥道嵐光曖曖兮霽人目黛色青蒼兮不堪掃
微鍾遠兮東林歸帆邈兮仙島彼角巾兮逍遙誰同兮
笑傲予迷途兮既久愧還山兮不早何雲松兮可巢感
吾生兮將老

女耕田行

鳴鳩喔喔屋上啼東隣西舍把鋤犁兒家兄弟久邊戍
數畝山田空草畦山田况是多磽确無人無牛廢耕作
母今年老女未笄門戶蕭條轉衰薄掩面含羞學種田
道傍觀者盡垂憐去年潦旱妨秋稼盡鬻裙釵輸稅錢
春來依舊愁辛苦竊向田頭拜田祖黃葛衣吹野草風
青蒲笠帶山花雨路逢邊使忽悲傷聞道兒兄死戰場
欲收兄骨向何處女身不及東家郎

孀婦吟

開篋見珠翠思君前日情只言恩愛長相顧豈悟音容
隔死生東流逝水何時返倏忽青天彩雲散銅鏡粧臺
不復窺羅襦綵被荒塵滿月明蕙帳寒如水燈火熒熒
照虛位寂寞空簾鵲影閑蕭條窮巷蟲聲碎東隣車馬
如雲屯西隣歌舞日紛紛不羨他家夫婦好寧甘守節
在君門新墳我我倚林麓春去秋來草應綠夜半傷心
不忍啼天明獨抱孤兒哭

代閨人答輕薄少年

繁花笑芳年蔓草對幽思妾本燕趙姿誤身任俠子長
安任俠矜少年五花白馬黃金鞭平明馳逐新豐市日
晚吳姬壚上眠玉驄一別知何處可惜佳期夢中度筇
竹丁香起暮猿枕屏十二巫山雨落盡冬青猶未回轉
頭黃葉委蒼苔空簾盡日無人見寂寞黃昏月又來

賦得劔津送浮丘鄭先生之江西考文

閩溪迢迢掛絕壁平津之水深千尺神物湮沈不復知
往往潭心飛霹靂銀河掩映流寒聲玻璃井上雙龍行

九華山色分照耀丹楓寂歷秋風鳴吾夫子浮丘生送
君幾度持文衡扁舟觸熱那可度來往津頭須濯纓

梅城小景

江城何人夜吹笛寒落梅花曉無跡仙嶠蒼茫隔海清
人烟寂歷連秋色何處征帆天際歸夕陽楓樹鳥邊微
磯頭亦有垂綸者甘向滄浪老布衣

雙燕

雙燕飛雙飛復雙栖瓊窻綵戶九天上銜泥出入黃金

靡那知繁華盡一旦失栖托柏梁寂寞吳宮焚飛飛去
入誰家暮我心本憔悴顧汝兩傷悲何當化作比翼鳥
翩翩復上青雲飛

還山吟


我所思兮商顏之峯首陽之岑烟霞明滅傾洞不可極
但見迸泉颯颯飛雨愁深林中有玄猿叫月鳴鶴在陰
採芝行歌不復聽食薇遠引終難尋古來龍蠖皆有道
至人舒卷應無心吾不能學蔡澤取卿相又不能學季

子多黃金耦耕忘世志何潔楚狂歌鳳譏已深我欲還
山發哀吟天冥冥兮雲陰沈白石兮粼粼流泉兮泔泔
拂商羽兮絃素琴山之靈兮來賞音彼聾俗之顛倒兮
樂淫淫駸駸吾將捐其袂解其襟脫蒼龍之佩荆王之
簪悵佳人於極浦涕淋浪而沾襟

挽陳子賢

清猿血滴泉中夜山靈怨死薜蘿罇辛夷吹烟香徑斜
鬼燈明滅寒泉瀉玉樓帝遣迎仙魄劍挂殘星冷枝碧

落月衣寒地下秋
海天夢斷桐花夕



草澤狂歌卷二

欽定四庫全書

集部

草澤狂歌卷三

詳校官庶吉士臣李傳熊

中書臣劉源溥覆勘

覆校官中書臣張虎拜

校對官原任典簿臣郭祚職

謄錄監生臣連彭年

欽定四庫全書

草澤狂歌卷三

明 王恭 撰

五言律詩

九日

落葉滿秋山，親叨香靄間。
江村多雨外，世難幾人還。
白髮偏能長，黃花好是閒。
聊將一杯酒，暫爾解離顏。

寄別陳大坐罪之京師

淚沾行子衣不得顧庭闈祖席君難醉朋簪我獨違風
波千里別淮海幾人歸賸把鄉書寄新秋有雁飛

偕陳處士宿桓山禪室次韻

探幽識靈境習靜愛古剎林風落曇花山翠濕衣葛心
空愜道腴神清悟禪悅高興殊未窮殘鐘下微月

遊桓山寺

水木通禪觀清遊却忘還風泉衣上落魚鳥鏡中間綠
髮縱教變青雲未可攀超然人境外何必市朝間

三溪似陳澄清

書幌連溪曲春流拂樹過
野花雲際落山色鳥邊多
薄分違纓冕幽情變薜蘿
欣逢魯中叟談笑復如何

留別海上陳文學

瀛海東風後壺山夕鳥邊
相逢花歷歷恨別草芊芊
細雨延春酌疎燈耿夜眠
明朝江浦上何處復懷賢

又

客思已淒淒鉤輶雨外啼
家林歸夢積村路獨行迷
島

樹看成霧林花踏作泥辭君理行權萍水又東西

送馮生被役荆蠻

迢遞荆蠻路君行亂我心楚山南去遠湘水北流深鄉
望秋中樹邊城雨外砧窮荒人少到音問抵南金

送造士盧紀京貢

官柳拂行塵孤城帶遠人海天殘雪夜京樹入懷春白
髮相知少青山獨夢頻斯文應未泯行矣莫羞貧

暮春贈別方陳二公遊泉城

惆悵又分襟江亭酒緩斟桐花衣上雨楊柳笛中音醉
憶平原劔閑銷季子金五陵鞍馬盡恐負少年心

初秋露坐有感

夜蟬鳴露葉林館候初涼髮逐秋風變愁分漢水長一
身天地窄五口歲時荒山魅無情極聞余應斷腸

滄洲雜詠中賦得蟾蜍水滴

三足斂精耀置君書案頭願輸涓滴清助爾文墨優顧
兔未同羣開蛙非與儔無因反月窟千載從一作滄洲

題鄭氏家藏古畫

涼雨淨氛瑤孤雲結層陰飛流激芳澗嘉木澄幽林鳥啼谷中趣人間川上心誰為後來者當期此投簪

夏日遊靈瑞寺

鶴石孤峯轉龍宮古道斜如何在人境別自有仙家流水仙梯近歸雲覺路賒勝遊須永日何必在生涯

二

蘭若當生處經過憶舊林樹迴青嶂合門掩白雲深野

烏啼禪榻清池淨
客心終悲城市裏
人事日相侵

三

蕭王宮殿古高構
軼浮埃山遠人行少
江空潮自來濕
雲沾野榻飛鳥上
經臺自愧紅塵縛
無因共酒盃

四

古寺隣江島
蒼茫紫翠間
斷雲連野寺
孤鳥沒空山
酒榼穿花入
禪扉映竹關
幸陪巾舄醉
日暮始言還

古塞下曲

雲中今已平軍士凱歌聲天地邊塵沒關山漢月明洗
兵秋度磧牧馬夜歸營多少還家夢中原有弟兄

二

十二羽林郎橫弓事朔方陳雲遮塞月殺氣墮邊霜戰
苦陰山黑兵殘落日黃長驅射鵬手生繫左賢王

三

幾戰交河北天山暗雪花橫戈辭漢月驅馬入陰沙窮
漠依深壘殘兵慘暮笳風塵殊未息鄉國慢咨嗟

送人奉使日本

扶桑東海際望望水雲深
曉月都門別秋風別使心
魚龍驚漢節猿蜃貢南琛
且復勤王去歸朝早賜金

過冶城尋芝山蘭若訪從兄闡上人

梵宇相逢處依依憶斷行
佛香雲近榻禪寂鳥窺房
粥茗留清晝鐘魚出上方
空門多割愛猶解惜蓮芳

夏日喜故人見宿

林居清夜靜喜與故人期
卷幔涼先入深池影自移
桃

燈閑對酒掃榻坐聯詩明發天涯別重來是幾時

題前山過雨

灝氣集雲壑羣峯微雨晴商飈起蘋末木葉澄秋聲山
色依孤櫂天寒潮信平滄浪有清處可以濯吾纓

題馬圖

龍種來何處流沙路不窮自矜千里駿曾取貳師功影
入天池月聲嘶御道風只今憐駿逸誰數玉花驄

初夏寫懷

春歸南苑曙孤思倦登樓野樹青殘雨江雲白遠洲鳥
啼驚物換草綠伴人愁獨有龍泉劍光芒射斗牛

西岩庵前小池

西岩春池小泠泠隱翠微虛圓窺色相恬淡印禪機雨
積龍泉古波澄鳥影稀塵纓從此濯相對欲忘歸

擬唐高適送鄭侍御謫閩

閩川今謫去惆悵復離羣別夢逢京雨愁心住楚雲猿
聲聞樹遠帆影越江分聖主恩波重多才不棄君

經冶城尋芝山蘭若訪從兄闡上人

蘭若三山下相逢慰所思
支離驚落葉留戀惜連枝
境靜禪皆寂身空病不疑
自憐塵土隔徒有鶻鷁悲

寒山過雨圖

落葉塞鴻秋澄江湛不流
數峯殘雨外獨樹斷雲頭
暝色浮僧磬寒光入釣舟
向來濯纓處迢遞隔滄洲

漁隱

自無簪組分結屋近苔磯
夜月懸孤艇寒潮入半扉
溪

山曾無趣魚鳥已忘機為問青雲者誰能忍布衣

殘夏懷西岩舊隱

關河暑漸收池館欲迎秋忽憶山中事偏懷靜者流焚
香依曉榻洗鉢動寒湫苦被紅塵縛何期到上頭

送僧歸日本

滄波杳無際望望入扶桑杖錫遊何處歸途信一航龍
宮朝洗鉢鮫室夜焚香法侶遙相待松枝偃舊房

遊靈瑞寺偶賦

白雲精舍近一路入迢遙古壁留殘靄微鐘送暮潮
啼空翠晚花落斷香飄此地堪攜興何須度石橋

經漂母墓

寂寞淮陰路荒城接楚原誰能懷漂母曾此飯王孫
孤塚今猶在千金不復論自慚非國士茲去向何門

擬唐韋應物賦得暮雨送李曹

江城分手處夕雨更沈沈野樹含滋色層峯沒翠岑
空濛關塞遠飄泊海門深送別情無限絲絲淚染襟

經爐峯蘭若

迢遞孤峯裏空門偶獨行
野雲隨杖屨古木帶簷楹
月出禪初定僧閑鳥自鳴
興闌歸自晚鐘磬有餘聲

山水圖

半幅生綃裏分明見遠山
斷橋分瀑溜古木隱岩巒
野色烟中沒孤雲鳥外還
幽栖如此得何必市朝間

二

山水無窮趣看圖憶勝遊
葉藏雲外塔風穩

舟岩

際隱遙月藤陰下碧流從茲得佳賞何日去瀛洲

三

山水愜幽盟蕭蕭薜荔情天邊孤嶂遠鳥外白雲橫野
衲聞猿坐山人伴鹿耕看圖應不厭疑是輞川行

枯木

野木臨崖石年深土亦崩老根浮斷蘚飛幹接長藤性
朽空勞匠心灰也類僧春風幾榮謝羨爾獨稜層

贈別畫史林虛白歸嶼南

憐君心不羈水墨始清竒
瀟洒南宮態空濛北苑姿
壺觴傾邂逅歧路惜分離
後夜分遙憶猿啼海樹枝

武夷山訪道

投簪尋羽客山水慢亭清
九曲烟霞色數峯鐘磬聲
還丹飛九轉仙籥受長生
寂寂藤蘿外惟聞鸞鶴鳴

齋居喜故人陳希召過仍送別云

相思飛鳥外海樹共春雲
歧路誰知已空齋獨見君
故情猶戀戀別思又紛紛
相送無窮恨壺山向夕曛

泊舟武昌

孤舟隨鳥沒，漸至楚王城。
黃鶴久飛去，高樓空復情。
岳陽春樹歇，漢口夏雲生。
鸚鵡芳洲近，淒涼待月升。

題猿鹿圖

丹青翠微裏，猿鹿共幽閑。
掛影寒潭外，群遊落照間。
養茸尋藥圃，得樹入雲閒。
年少無游獵，山林恣往還。

晚濟龍門渡因訪高慢士

向夕龍門渡，風潮半落霞。
暫停遊子棹，得訪故人家。
浦

口魚留近津頭酒慢斜踟躕那忍去乘月涉江沙

夜泛臺江

無諸古城外潮滿合沙洲賓從留驄馬壺觴度彩舟山
迴川夜月猿怨海雲秋寂寞屠龍事臺空江自流

送客還薊丘

江南春草歇斗酒送歸程別路閩山色鄉園易水聲嶺
雲遊子恨邊柳故關情握手自茲去空聞征雁鳴

經故人墳

東城日將曙驅馬入寒雲無復平生友空餘數尺墳
臥麟行鳥跡斷碣積苔紋欲薦寒泉水臨風涕泗紛

喜嶼南景霞子兄弟見過

林家好兄弟清潤比璠璣海嶼耕殘業天壇夢舊居
相逢三徑草清話一樓書莫遣明朝別思君恨有餘

贈鑿者

仙鑿何處住賣藥到山城歲月壺中度人烟醉裏行杏
林春樹曉橋井野泉清已飲上池水何論指下明

題靈瑞招提

連峯入翠微，海色上行衣。
寺古殘僧少，林空野鳥稀。
幽花燃石洞，芳草沒山扉。
盡醉壺中物，長歌送夕暉。

誦道經

盥濯宴心坐，焚香講道經。
青童開寶笈，白髮對黃庭。
王

經有

天花續
紛語

送隣人葬

卜隣今幾年此別間黃泉洒淚臨長道招魂若箇邊夜
臺春寂寂蒿里樹芊芊歸路東城晚誰家思管絃

四月東湖泛舟

落日東湖裏相攜著綠舟澄明憐水物浩蕩狎沙鷗載
妓從歌舞飛觴任去留綠荷深處月流影上滄洲

山人入城

翠微行漸遠去去入城扉斷續人烟近荒涼故舊稀市
廛沾草屨官柳拂荷衣惟有空濛水東流無是非

久雨後湖堤散步借三同志

湖上雨新晴相將著屨行
葛衣沾野色紈扇引波聲
吟響魚皆聽機忘鳥不驚
隔林村路晚歸興月初明

避暑

林幽行避暑藤葉晝陰陰
地僻無行客山深獨抱琴
白雲時在屨流水始知音
寄語塵中者同來共息心

三山送客歸錢塘

分手螺江上青山驛路長
嶺雲添別恨關月照行裝
浙

水金鱗活西湖白藕香
羨君從此去調膳上高堂

遠浦帆歸

寂歷釣魚磯青山帶夕暉
天邊飛鳥絕浦口一帆歸
花喫鴻聲小蓬窻月色微
叩舷閑獨坐忘却白鷗機

二

浦澗沿村曲孤帆一片秋風移
蓬裏軸影拂水邊樓鼓
柁驚初雁鳴弦起夕鷗
江湖波浪緊幸喜見安流

夏夜聞笛

露坐空庭夕，遙峯片月明。
誰將楊柳調，吹作鳳凰鳴。
思繞坡仙夢，聲隨嬴女情。
舊遊寧再得，聞此轉悲生。

二

誰截湘南管，晴樓午夜吹。
數聲孤月下，獨客斷腸時。
零落梅花片，蕭條楊柳枝。
天明漢江上，何處覓桓伊。

贈隱者赴名

鶴書天上去，迢遞到山城。
獨賦驪駒別，空懷薜荔情。
吳中爭騎遠，淮上一帆輕。
漸到金門下，君應被寵榮。

二

習靜東山裏空林閉兩扉獨承丹陛詔暫解綠蘿衣
獨鹿誰同伴烟霞跡漸稀五雲霄漢上還有夢來期

訪山人不值

迢遞過前峯林深爽氣濃也知行處盡猶未與君逢
白壁猿啼榻空潭樹翳鍾不知人代裏何日得相從

二

山中尋舊侶何事掩荆扉樹密藤花落籬深菜草稀
蕭

條人不見寂寞鳥空歸
葉上留名去孤雲與願違

林塘夏夕有懷同志

風微池色定林靜藕花香
深樹歸殘鳥青山斂夕陽
同心嗟遠道久別隔他鄉
世事今如此何因共舉觴

書雲山小景

遠樹綠依依澄江去棹微
人烟連極浦僧舍對殘暉
山迴雲來白林深客到稀
紅塵多少事即此可忘機

夏夜舟中

暑氣夕仍熾澄江思夜遊孤舟乘楚月醉客發吳謳漁
浦鐘初斷楓林火漸收鷄鳴看海色城闕復堪愁

送人下第歸桐城

如君寧久微且復顧庭闈折桂暫無分飄蓬今獨歸壺
公當過道金粟待行衣遙想青燈下閉堂靜掩扉

冶城馬上

策馬三山路經過似勝遊千門烟竈曉獨樹釣臺秋雁
塔天邊小孤帆鳥外愁晚來燈火起鐘鼓鳳池頭

山路見落花

野花垂嶺口無主亦芳菲
色映林僧帽香隨木客衣
淒涼獨折去零落鳥銜歸
日暮行人絕山風吹更飛

漁樵清話

礪斧出幽林移竿野水深
相逢休問姓偶坐便知心
岩桂香堪爨江鱗美易尋
平生山水趣終不為朝簪

登鳳山仙人梯

磴道蒼苔古緣雲上石梯
依微殘雨雪迢遞拂雲霓
乍

可臨仙路誰堪駐馬蹄
回看煉丹處岩畔草萋萋

二

鳳山東海際蒼翠白雲封峭壁懸梯近幽林挂瀑重虹
蜺侵絕澗星漢接危峯不見燒丹者空憐避世蹤

贈別友人之長沙太守

聞說長沙郡湘南驛路微
楚山猿亂叫湘水雁孤飛
見月鳴琴坐行春佩印歸
憐君五馬貴自笑綠蘿衣

織婦

草蟲鳴促織深夜動鳴機玉手挑燈暗羅衫染淚微常
懷筐篚貢又憶塞垣衣用盡閨中力天邊雁未歸

王昭君

行旌入塞垣回首望君門漢月牽愁思邊塵慘淚痕琵琶
霜外曲羌笛夜中魂惆悵羶廬下空聞刺刺言

經山中舊宅

行行林路遠此地復傷懷斷壁懸疎蔓閑門翳古苔隣
僧驚獨住野老候重來欲去仍回首猿聲處處哀

贈講僧

吾師能演法往往落天花諦聽來何處
筌蹄付作家三
闕翻貝葉雙樹拂袈裟早晚離言說
空潭有月華

題王孫挾彈圖

金衣騎小駟迢遞茂陵山接鶻花邊
過鳴鞭柳外還
斷猿驚羽箭過雁落金丸歸醉瓊樓夕
天街雪正寒

林下逢僧

林中見緇錫相問始知名對坐松聲晚
澄心澗影清談

空歸妙法說有愧勞生月出從分別惟聞山鳥鳴

山莊獨夜

獨坐空牕裏幽泉入戶鳴山林甘寂寞風月共淒清夜
半猿聲斷空庭燭影明蕭條松葉下纓冕不關情

夏月過周六園林因有茶瓜之會

森爽鳳山裏林幽暑自移幸無塵外事應有靜中期鳥
觸牽風慢猿投宿露枝茶瓜並異味隨興且淹遲

獨酌言懷

行歌與醉吟誰識一生心
白日蹉跎過青山感慨深
酒酣空擊筑愁極少知音
且盡壺中物仙源何處尋

山行聞樵歌

樵歌何處響迢遞
白雲深嫋嫋
潭邊起蕭蕭
空外音何須
諧律呂即此是謳吟
却厭青樓曲商音
攄暮林

過皇恩寺

上國僧遊去山門日自開
紺園依綠草畫壁上蒼苔
谷暗猿初斷林空鶴又回
惟餘舊童子笑問客何來

燈下寫懷

獨坐山窓裏燈殘欲二更
月中山葉墮階下草蟲鳴
風便遙鐘響霜寒獨自驚
青雲猶未達徒此悵離情

梅城雪夜

夜靜潮聲遠城高月影寒
梅花孤角斷燈火幾家殘
楓葉愁中落鄉林夢裏看
天明倚霜樹雲水浩漫漫

寒村隱者

谷口微霜度寒村獨見君
西風見蕭瑟落葉不堪聞
古

路無行客閑門有白雲為憐幽處好不忍更輕分

秋江送行者

殘柳綠依依離樽對夕暉斷鴻隨去櫂落葉映行衣楚
國烟中盡淮山鳥外微宦遊終在客歲晚早言歸

秋中九日登南樓

海上登臨望荒城水亂流天邊孤嶂雨烟外幾家秋近
郭寒砧響長沙落雁愁鄉心正無那回首仲宣樓

秋日送僧還山中

西風殘葉下錫杖返東澗浮世空傷別孤雲不住心人
烟飛鳥絕山月斷猿深後夜相思處惟聞鐘磬音

搗衣

獨抱清砧冷那堪搗夜闌淚飄雙杵落愁絕一燈殘烟
月閨中趣風霜塞上寒年年空寄遠相憶恨漫漫

九日鳳山載酒

九日鳳山路登臨喜盃簪風飄烏帽落雲度菊盃深樹
色殘孤笛鴻聲帶遠砧醉來同藉草不覺夕陽沈

秋江獨釣

蕭條驚葉墮孤坐子陵灘積水搖棕樹微風颺竹竿雁
催秋色晚霜降笛聲寒釣罷行來夕楓橋日又殘

秋暮寄山中人

水國催寒早霜風幾夜砧懷君隱居處落葉亂山深野
鳥無遺路孤雲不繫心懸知燈火夕閑坐聽猿吟

秋山行旅

客路青山外蕭條盡白雲猿啼山寂寂霜降葉紛紛野

寺鳴烟磬空林帶夕曛望鄉心未已殘笛不堪聞

都門留別

都門霜葉赤車馬正紛紛祖帳黃花酒孤舟日暮雲龍
池初月上長樂曙鐘聞落羽悲紛去懷君鷓鴣羣

初冬登南樓

樓隱青楓外南天葉未霜寒山低度鳥芳岸入斜陽復
嘆年光暮空憐鬢髮蒼故園三徑晚歸笑醉壺觴

江城暮角

何處王龍鳴寒江帶楚城梅花天外落客淚夜中傾思
苦胡霜入聲淒漢月明湘南多謫宦誰是不關情

寒山送客

相送空林下千峯鳥外微寒風飛去旆野燒帶行衣谷
口遙鐘度天涯遠騎歸知君愁此別應念故人稀

鳴砧寄友人

候館空垂幔荒城又搥砧寒聲霜外落愁思夜中深響
度銀燈暗清和王漏音同袍嗟久別因此惜驚心

松林觀瀑圖

瀑布懸空青初陽互明滅噴壁飛白虹穿林散晴雪淙淙鶴夢清洒洒機心絕相顧濯塵纓滄波坐超越

冶城客夜

鐘斷夜色寒孤吟客衣薄月色半城虛砧聲四隣作更殘酒氣微坐久燈花落乘興理歸帆四望無諸郭

送黃山翁還玉融

十載一相逢幾日滄洲客祖道又傷離勞歌復愁積孤

雲赴岩阿獨鶴鳴川澤歸去黃山中希君醉時墨

獨酌言懷

林居絕輪鞅獨酌形亦忘百年會衰朽一室任荒涼寤寐友千古遊心見羲皇所以陶潛翁頽然卧柴桑

秋塘曲

妾身在寒塘夫壻平原客白馬五陵遊空閨斷行跡憶昨別君時蒲生柳條碧及此君不歸登艫感秋色

寄上清王道人

閑齋澹無營，忽念山中侶。
鶴馭杳難期，瑤笙竟何處。
心懷九轉丹，夢繞三花樹。
矯首望孤雲，飛聲寄玄圃。

書上清方壺醉墨山水

林下多白雲，溪口繞水木。
長嘯鸞鶴群，翛然在空谷。
悠悠山色閑，浩浩波光綠。
寄醉墨壺中，惟應道機熟。

春登御風臺

寂歷芳臺古，天空野望長。
雨晴閑樹出，雪盡粵山蒼。
露蘚凝寒翠，烟花送斷香。
御風人不見，徒此立斜陽。

二

雁峯晴翠裏臺古獨登臨沙阜人烟積山城海戍深野
雲飄杖舄林吹拂衣襟仙路無期達空驚弔古心

閑居喜故人見過

幽獨空林下荒齋喜見君掃苔聊共坐剪韭更論文華
髮掃青鏡浮名寄白雲綈袍如有意慎勿又離羣

二

寂寞卧空齋閑扉閉綠苔一簾幽夢斷千里故人來野

竹迷連騎空花送酒盃又愁分手去心事向誰裁

送僧遊吳

遠師何處去迢遞別東林浙水人烟積吳門雨雪深寒
山孤燭影建業暮鐘音處處應留偈懸知不住心

與醫者遇詩以贈之

長柔親受訣復飲上池清賣藥寧論價還山尚隱名杏
林春露積桔井野泉平見遇能醫國何辭纓冕榮

經鄱陽舟中作

揚帆渡彭蠡雲樹曉冥冥潮到潯陽白山連建業青乾
坤隨去鳥江海任流萍回首鄉林遠歸鴻不可聽

登雁山望太常峯有懷所知

雁山青翠裏遙見太常峯勝槩無期到幽人何處逢仙
源雲縹緲祗苑樹蒙茸興盡獨歸去空林聞暮鐘

贈道省親

獨鶴下三天吹笙度紫烟道心飛鳥外親舍白雲邊丹
脉調香飯霞衣拂壽筵更教人代裏何處覓神仙

送邑令秩滿之天官

天南望帝畿迢遞入銓闈作縣三年別趨朝幾日歸楚
江帆漠漠淮岸馬駢駢想是龍池上香名是爾稀

六平峯山送人之吳

斗酒臨長驛孤帆半夕陽花催離思急柳引醉歌長楚
樹兼雲遠吳江到海蒼六平山下路何日更持觴

田家喜晴

田家當惜雨積雨轉傷苗
詰旦雲猶濕新晴潦漸消
迅

雷潛地底初日映山椒
預卜豐年兆何應答聖朝

送人使邊

漢節下青冥邊人望使星
繡衣辭鳳闕驄馬入龍亭
雪淨胡天綠春回塞草青
須令月支長函表到王庭

仲夏五日遊盤石

盤石臨湖面涼風薜荔清
酒酣山鳥狎曲度水龍聽
興極飛蘭櫂神遊到玉瓶
不知湘水上飄泊為誰醒

盤石蒼山口，懽游重盃酒。
醒荷氣馥雲，斷水容陰畫。
楫浮空迥，青娥隔雨深。
懷沙千古事，誰是獨清心。

詠荔枝

憶昔開元日，繁華御裏看。
玉環天上去，無復到長安。
香沁瓊漿冷，紅垂火刺團。
九重思玉食，馳貢未應難。

懷畫史林景時

故人何處住，獨樹孟家隣。
水墨今誰重，雲泉我共貧。
襟期多古意，交態任時人。
醉裏從揮洒，無錢奉老親。

二

水墨人皆羨承平祇布衣雲山隨處寫鄉樹暫時歸兩
地愁看月孤村獨掩扉幽期應早計何事久相違

與同志泛舟得江字

浦口齊橈樂滄波泛玉缸雲歸山點點天碧鳥雙雙蚌
月涼生夜魚風響渡江興來須劇飲無使寸心降

送友人伸蒙岩讀書

籌峯烟磬裏君去獨垂帷散帖林中晚懸燈雨外微書

聲連澗水人影落苔衣不獨伸蒙子辛勤似者稀

送人赴秋闈

涼露滴宮槐黃花映古苔秋風芹泮別曙日棘闈開戰
勝應誰敵名香得意回知君經濟手不愧子雲才

贈武夷僧

武夷山水好潭影空禪心掛袖雲生石翻經月照林履
行隨竹靜鉢洗向泉深九江仙源裏惟聞鐘磬音

仲秋洪山經狂客墓

狂客今何在風流世共傳
夜臺依宿草隴樹入新烟
月冷延陵劔湖空賀監船
秋風正搖落回首獨潛然

贈道人別

塵中那久住飛佩入千山
片石松邊住孤雲鶴上還
苔深丹竈綠葉墜紫宮閑
後夜玄洲月相思杳藹間

題美人吹簫圖

可憐嬴氏女粉繪若平生
無復乘鸞偶空餘弄玉名
隔花疑解語橫笛恍聞聲
却憶秦樓月偏闌獨客情

僧房秋夜

寂寂空門掩三花
隱亂峯經殘僧入定
林暝鶴歸松境靜
天香入簾疎月影重
永懷禪榻夜無夢
到塵蹤

寄建上客

建水接閩關連峯
鳥外閑魚商墟市遠
蝦菜野橋灣烟火
舟中飯鄉林夢裏還
年年貪利涉不道解離顏

月下聞琴

空林微月出花下一琴橫
忽聽宮商調而多山水情
雲

邊孤雁斷秋外百泉鳴坐久長河沒猶餘靈籟聲

擬題古山寺

靈源飛鳥外崩頂翠蒙茸雪覆經春葉雲殘渡壑鐘逢
僧留半偈習靜愛中峯自笑紅塵裏誰能寄遠蹤

和王摩詰山居卽事韻

寥寥人境外閑坐愛晴暉谷轉猿聲迴林幽鳥影稀雨
深苔蘚壁潭映薜蘿衣日夕忘機處孤雲去復歸

老將還鄉

百戰解重圍三邊受鉄衣蕭條關塞別迢遞故鄉歸舊
業春苗發青山白髮稀獨憐閑夜夢猶遶羽林飛

夜寒曲

霜葉冷颼颼鴉啼井上樓轆轤哀響斷蟋蟀夜深愁繡
被蘭香滅銀筍雁影流相思紅燭盡敲碎玉搔頭

暮秋太常峯掃松楸

迢遞孤峯裏含情對古丘苔碑空鳥跡山葉帶猿愁野
燒泉門夕寒花隴樹秋臨風一澆酒回首淚雙流

文石漁家

海國春鴻外人烟盡水鄉潮生孤嶼沒月出白沙涼夜
火鄰鮫室雲帆拂蠓房從來少耕種辛苦坐滄浪

題鷲峯廢寺

鷲嶺鬱蒼蒼香臺出上方苔花侵佛像荔葉滿僧房禪
榻餘殘靄鐘樓半夕陽空門無色相何必嘆淒涼

送道士還山中

仙臺飛鳥外灌木隱琳宮歸路多瑤草還山盡錦峯浴

舟臨野水飛珮入寒松愧我紅塵裏空憐絕世蹤

擬早朝

鐘鼓金門曙千官列雁行西山含落月北闕映初陽御
柳蓬萊色宮花太液香袖中有三策思欲上君王

山中即事

習靜當幽處閑扉隱翠微林間聞鳥近雲際見人稀曲
洞留殘雪高岩掛落暉遙知銅墨貴不羨薜蘿衣

暮春餞別

官柳拂晴烟情多又別筵且傾寒食酒將贈繞朝鞭遠
樹青雲外孤帆夕鳥邊明朝相憶處兩地聽啼鶻

暮春羈懷

旅館春將盡鄉心醉不迷人烟隨去住萍梗任東西花
落吳山暮鴻歸楚樹低解鞍空佇立無那子規啼

送僧省親

空門恩愛稀欲去省庭闈親舍無期別白雲長自飛浮
盃尋故里洗鉢見春暉莫遣紅塵裏人烟浣衲衣

閑居寫興

幽棲青嶂下塵事少相侵亦有漁樵樂而無纓冕心竹
閑書幌淨花汎墨池深醉卧雲蘿下機忘鳥自吟

山路聞鷓鴣

朝入翠微畔鉤輶雨外鳴聲聲行不得去去若為情苦
竹相南驛黃茅嶺外程鄉心正無那聞爾淚沾纓

擬唐賈島題李疑幽居仍次韵

愛爾幽棲處清涼水竹園遠山頻對酒芳草獨開門卷

慢通雲影橫琴拂石根仙源只如此相對更何言

山行逢故人墳

繫馬荒林下蕭條對古墳傷心逢斷碣揮淚讀遺文宿
草今誰泣清猿不可聞空餘三尺劍落日掛楸枰

山寺讀書

羸糧尋翠巘負笈入琳林書映藤蘿色聲隨鐘梵音
香孤鳥外燈影斷猿深寂寂空門夜閑窺往聖心

聲聲連梵音人影與禪心散帙維摩室懸燈支遁林靈
花開戶落法雨下帷深洙泗東流去真源何處尋

寄衣曲

孤月照庭闌相思剪合歡淚從燈燭下霜入闕寒絕

漠闕遠空閨錦帳殘憑君封裏裏誰為著時看

夏夜寄宿僧房

薄暮中峯裏遙聞仙梵音獨尋鐘磬遠漸至薜蘿深月
色虛禪室泉聲到客簷誰知慧燈影于此照塵心

寄馬秀才下第歸

鄉闈不得意秋卷自呈親
共恨持衡手空憐泣玉人
拂衣楓葉冷歸權菊花新
擢秀非難取長歌泮水春

春陰

海國東風後千門積曙陰
斷雲隨雨薄歸雁帶烟深
柳暗迷征騎花寒笑客簪
翻憐勝遊地愁絕五陵心

宮鶯

宮漏曉沈沈間關百轉音
聲隨天樂下色借御袍深
柳

外窺殘黛花間識墮簷長門終日閉聞爾獨關心

暮春都門送客

四牡正駢駢承恩出帝畿五門宮漏斷千里布帆飛烟
火吳山遠鶯花楚樹稀過門應暫住不久換春衣

新燕

烏衣何處別迢遞落春塘舊壘逢新主空簾見夕陽水
芹沾嘴活烟柳拂衣香何必吳宮樹秋風亦斷腸

寒食登臨

山水空青處烟蘿鳥道邊千門初禁火獨樹已啼猿
溜和清唱飛花拂綺筵回首古城下新塚草芊芊

宮井

甃石長門裏虛圓一鑑清銀床苔蘚積絲綆轆轤鳴
淡泊如恩淺清冷似妾明鉛華空自照惆悵若為情

田家留客

爨突曙烟新蠶房絕四隣相逢江上路且醉甕頭春
稚子摘紅葉家人烹紫鱗感君情獨厚應不笑家貧

送春

綠樹海邊樓年光逝水流向來攜手處誰是少年游池
草生還夢林花落更愁若為送春去吟髮又成秋

贈故人陳孟敷牧安陸州

還鄉能幾日五馬又駢闕下陳三策人間望一麾帆
飛瀆水闊路繞鳳山微送別無窮恨空慚獨布衣

睡覺山中

林棲無外事心似野僧閑萬籟千峯起空簾午夢還松

香飄蕙帳苔色映柴關獨鶴歸來晚遙鐘若箇山

挽僧

雙樹經行處空懷結淨因松聲禪榻夜苔色影堂春如意閑孤月袈裟積暗塵空門了生滅塵世獨沾巾

夜泊楓橋懷所知

落日閭門外楓橋暫泊舟寒山初上月吳苑欲含秋別夢千重遠殘鐘半夜愁天明望鄉樹迢遞憶同遊

送衲子西遊

遊方叅佛祖一錫別東林世路蛾眉外人烟劔閣深風
霜移戒鴈水月印禪心早晚離言說還山思梵音

暮秋登冶城平遠臺

山壓無諸野臺芳半夕暉連天孤樹遠滄海片鴻飛紺
苑皆黃落琳宮盡翠微回看南陌上四牡正駢駢

海江送林中州歸

不羨魚羹飯寧甘苜蓿香小齋隣鱗舍曲几近蛟房別
路分沙堰行衣受海霜到家看舊竹涼月滿橫塘

送人還建上

建水千峯外春城送獨歸
雨花飄別酒津柳拂行衣
劔浦孤帆遠閩天一雁飛
到家應幾日書信莫令稀

宮燕

杳杳別烏衣還尋禁苑飛
結巢依繡戶識主近羅幃
影落宮潮小聲沈御柳微
長門春寂寂猶憶海西歸

春日登龍華觀

籌岳青翠裏琳館是仙家
徑轉龍峯逼林深鳥道斜
白

雲隨杖舄金磬出烟霞幽覺塵心遠蒼藤落數花

贈別陳孝廉赴京師

斗酒粵城闈千門柳色新孤帆辭海月疋馬入京塵鳳
闕趨朝早龍池聽漏頻青雲從此去應念布衣貧

上巳邑中值雨

瀟瀟江上雨孤館獨留人山水愁中趣鶯花客裏身
樓寒樹合僧舍曙烟新遙憶蘭亭會淒涼幾度春

山人以春茗見寄賦以荅之

仙嶠多靈草紛披穀雨前色疑蒙頂霧香訝武夷泉林
屋人稀到山厨手自煎愧無瓊玖報徒此寄雲箋

題山水雪景

雙毫閑染處隱見雪花飛萬壑飄瓊樹千峯掩翠微灞
橋吟影度剡曲棹舟歸因憶陽春調而今和者稀

送張道士歸山用唐人韻

烟霞寧久別歸去禮元君養道看黃老將身寄白雲人
依松作伴身遠鶴同羣回首千峯暮瑤歌鳥外聞

送邑長史

白面魯諸生寧知贊畫榮
一經諳治體百里見民情
入幕郎官喜揮毫案牘清
一貧今似水處處見香名

送僧住崇聖寺

青山崇聖寺方丈久荒苔
愛爾禪枝秀如今法宇開
明心超上乘真旨悟西來
振錫從茲去雲邊施食臺

題道人幽居

學道居人境林扉畫亦關
燒丹傳妙訣采藥問名山
醮

罷三花落經殘一鶴還黃精新釀熟常有好容顏

伸蒙岩讀書

我愛伸蒙隱攜琴入翠微身閑隨鶴遠心靜見人稀
散
快時聞磬懸燈獨掩扉淵源那可測探蹟日忘機

贈林濟之江田送舅氏赴京選

宅相今誰是名家復見君同心看白水送別上青雲
海
樹烟邊合江田鳥外分阜陽歌酒夜相對思紛紛

題王晏碧梧山房

梧寺隱山房憐君若鳳凰一簾秋影靜半榻夜聲涼葉
露沾書帖烟花拂酒香行當中琴瑟清廟有輝光

塞下

萬馬防秋急三邊殺氣昏鳴笳雙雁落伐鼓夜兵屯月
照黃沙磧風乾白草原空持三尺劔白首未承恩

夜宿石門聞秋風

洞口微鍾夕陰林散夜聲孤燈殘月下千嶂斷猿鳴颯
沓驚禪定蕭條動客情卷幃清不寐松際月斜明

文石江村

獨樹斷猿頭
天空水自流
人家分島嶼
魚艇半滄洲
海色將帆莫
潮聲入戶秋
為憐魚鱗美
長醉酒家樓


與同輩遊霍童山

白鶴今何在
千秋共鶴林
人烟山縣小
魚鳥洞天深
苔色迷仙跡
泉聲淨客心
無因問丹訣
天路杳難尋

送滄洲出邑偶賦

白髮卧滄洲
翩然憶舊遊
醉尋陶令酒
吟倚謝公樓
砧

杵千門夕梨棠一縣秋去逢高慢士應是久淹留



草澤狂歌卷三